

- प्रधानमंत्री नरेन्द्र मोदी कह्यो-सरकार लारला बारह साल मांय महिला आधारित विकास सारु माहौल बनायो ।
- प्राकृतिक अर जैविक खेती ने बधावो देवण सारु जयपुर मांय राज्य स्तर री कार्यशाला राख्यी ज्यी ।
- राज्य सरकार सड़कां माथे हिफाजत ने जन आंदोलन बणावण सारु भेळी जिम्मेदारी सागे काम करण री अपील कीनी ।
- प्रदेश रा ऊगणी हलकां मांय गरज-चमक सागे बरसात-आतूणी हलकां मांय लू रो कोप ।

000

प्रधानमंत्री नरेन्द्र मोदी कह्यो है के केन्द्र सरकार लारला बारह साल मांय देश बणावण रा काम मांय महिलावां री पूरा बूता सागे भागीदारी रो एहसास करावण बाबत् अनुकूल वातावरण तैयार कीनो है । सोशल मीडिया पोस्ट रे जरिए श्री मोदी कह्यो के हर हलका मांय महिलावां री मौजूदगी निजर आ रही है ।

000

केन्द्र सरकार वित्त मंत्री निर्मला सीतारमन ने एक निवेश प्लेटफॉर्म रो प्रचार करता थकां बतावण वाळा वीडियो ने फर्जी बतायो है । पत्र सूचना कार्यालय री फैक्ट चेक इकाई वीडियो ने गलत बताता थकां कह्यो के इण मांय 22 हजार रुपया रा निवेश माथे रोजीना 80 हजार अर हर महीना चौबीस लाख रुपया मिलण रो दावो करी ज्यो है । पीआईबी फैक्ट चेक इकाई रे मुजब ओ वीडियो ए.आई. ऊं बनायी ज्यो है ।

000

प्राकृतिक अर जैविक खेती ने बधावो देवण सारु आज जयपुर मांय प्रदेश स्तर री प्राकृतिक खेती कार्यशाला अर मल्लखम्भ प्रदर्शन राख्यी ज्यो । इण मांय राज्यपाल हरिभाऊ बागडे, मुख्यमंत्री भजनलाल शर्मा अर गुजरात रा राज्यपाल आचार्य देवव्रत किसानां ऊं कीडा मारण री रासायनिक दवाइयां कम काम लेवण अर प्राकृतिक खेती करण बाबत् कह्यो । श्री बागडे किसानां ऊं रसायन काम लियां बगैर अनाज उपजा र जनता ने बीमारियां ऊं बचावण मांय मदद करण री अरज कीनी । कार्यक्रम मांय मुख्यमंत्री भजनलाल शर्मा कह्यो के किसान पंचगव्य, जीवामृत, बीजामृत अर मल्लिखंग सरीखा प्राकृतिक खेती रा तरीकां ऊं इंसान अर मिट्टी, दोन्यू री सेहत रो ध्यान राखे है । मुख्यमंत्री कह्यो के मौजूदा दौर मांय रासायनिक खाद मोटी तादाद मांय काम लेवण ऊं मिट्टी रो स्वास्थ्य खराब व्हयो है ।

000

श्री शर्मा कह्यो के किसानां री बरकत सारु राज्य सरकार पाणी अर बिजली री उपलब्धता तैय करण री विगतवार योजना बनायी है । ई मौके गुजरात रा राज्यपाल आचार्य देवव्रत कह्यो के रासायनिक खेती रे कारण खेतां मांय मिट्टी मांय ऑर्गेनिक कार्बन घणो कम व्हयो है ।

000

बूंदी जिला री केशवरायपाटन, तालेडा अर हिंडोली पंचायत समितियां रा कामकाज मांय लापरवाही रा आरोप मांय बी.डी.ओ. अर 11 ग्राम विकास अधिकारियां ने मुअत्तल कर दिया ज्यो है । आं ग्राम विकास अधिकारियां रे खिलाफ 16 सीसीए रा तैत विभागीय कार्रवाई सारु करण रा हुकम ई दिया ज्यो है ।

000

प्रदेश मांय आज शहरी अर ग्रामीण सेवा शिविर सरू व्ह्या। 15 जुलाई ताई चालण वाळा आं शिविरां रे जरिए लोगां ने न्यारी-न्यारी सरकारी योजनावां अर सेवावां रो फायदो आसानी ऊं दियो जा रह्यो है अर न्यारा-न्यारा महकमां ऊं जुड्या काम मौके ई निपटाय जा रह्या है। केन्द्रीय वन अर पर्यावरण मंत्री भूपेन्द्र यादव आज अलवर मांय शहरी सेवा शिविर री सरूआत कीनी। ई मौके वे लोगां ऊं शिविर मांय मुहैया कराया जा रह्या सुबीतां री जाणकारी लीनी अर जमीं रा पट्टा दीना।

000

मेडिकल कॉलेजां मांय दाखिला सारू 21 जून ने ओजू ली जावण वाळी नीट यूजी परीक्षा मांय अब विद्यार्थियां ने 15 मिनट बत्ता मिलेला। राष्ट्रीय परीक्षण एजेंसी-एनटीए रे मुजब अब 195 मिनट री आ परीक्षा दोपहरां पाछे 2 बज्यां ऊं सिंज्यां सवा 5 बज्यां ताई ली जावेला। दूजी कानी कोटा विश्वविद्यालय री ओर ऊं राजस्थान राज्य पात्रता परीक्षा-सेट 2026 ई ई साल 6 सितम्बर ने ली जावेला। ई सारू 14 जून ऊं 15 जुलाई ताई ऑनलाइन ऑन लाइन तरीका ऊं अर्जी दी जा सकेला।

विश्वविद्यालय रा कुलगुरु प्रोफेसर बी.पी. सारस्वत बतायो के ई दफा आ परीक्षा राजस्थानी, सिंधी, पंजाबी, फारसी अर उर्दू समेत 35 विषयां मांय ली जावेला।

000

उपमुख्यमंत्री अर परिवहन मंत्री डॉ. प्रेमचंद बैरवा सडकां माथे हिफाजत ने जनता रो आंदोलन बणावण सारू सगळा ऊं जिम्मेदारी सागे काम करण बाबत् कह्यो है। वे आज जयपुर मांय स्टेट रोड सेफ्टी काउंसिल री मीटिंग मांय बोल रह्या हा। उपमुख्यमंत्री सडकां माथे हिफाजत रा जतन असरदार तरीका ऊं करण, सडक हादसां री जद मांय आवण वाळां ने तुरत मदद अर बेहतर ईलाज मुहैया करावण रा ई हुकम दीना। वे सडक सुरक्षा मित्रां ने प्रोत्साहन राशि सागे जरूरी साज-ओ-सामान देवण बाबत् ई कह्यो। डॉ. बैरवा जनता सारू आसान अर आरामदायक सफर तैय करण सारू बसां री फिटनेस जांच करावण अर बस चलावण वाळां रा स्वास्थ्य री जांच करावण माथे ई जोर दीनो।

000

केन्द्रीय सामाजिक न्याय अर अधिकारिता राज्य मंत्री रामदास अठावले नौजवानां ऊं नशा नी करण बाबत् कह्यो है। वे आज जयपुर मांय नशा मुक्त भारत, जन चेतना सम्मेलन मांय बोल रह्या हा। अठावले नौजवानां ऊं वां री ताकत देश बणावण मांय लगावण सारू कह्यो। केन्द्रीय राज्य मंत्री कह्यो के नशा ऊं समाज रा हर तबका ने नुकसाण व्हे है। वे सगळा लोगां ने आरे-सारे रा नशा करण वाळां ने नशा छोडबा सारू प्रेरित करण बाबत् कह्यो। वे जाति रा आधार ऊं जनगणना ने देश सारू चोखी बतायी।

000

श्री अठावले कह्यो के नशा मुक्ति केन्द्र खोलण वाळां ने सामाजिक न्याय अर अधिकारिता मंत्रालय री ओर ऊं माली मदद दी जावेला। वे एक गैर-सरकारी संस्थान कानी ऊं राख्यी ज्या नागरिक अर दिव्यांगजन सम्मान समारोह मांय ई शिरकत कीनी। ई मौके वे कह्यो के मंत्रालय दिव्यांगजन ने जरूरी साज-ओ-सामान मुहैया करावणा तैय कीनो है।

000

आज बालश्रम निषेध दिवस मणायी ज्यो। ई मौके करौली मांय बैक टू स्कूल अभियान सरू करी ज्यो। ई रा तैत 12 जुलाई ताई सामुदायिक जागरुकता ऊं जुड्या कार्यक्रम राख्या जावेला। ई सागे ई स्कूल छोड चुक्या बच्चां ने ओजू भणार्ई-लिखाई ऊं जोडबा अर बालपणा मांय ब्याह ने रोकण माथे जोर दियो ज्यो। जिला रा तीस गांवां रा सर्वे मांय करीब साढे छह सौ टाबरियां रे स्कूल छोडबा अर छह सौ टाबरियां रो बालपणा मांय ई ब्याह व्हेवण री शंका री ठा पडी। पाली जिला रा सुमेरपुर मांय एक बच्ची ने मजूरी ऊं आजाद करायी ज्यी।

000

राज्य रा ऀगणी हलकां मांय लारला चौबीस घंटा मांय बादळां री गाज अर बीजळियां री चमक सागे जोरदार बायरो बाज्यो अर बिरखा व्ही। श्रीगंगानगर मांय आज ओळा पड्या। दूजी कानी आतूणी हलकां मांय कठे-कठे लू बाजी अर रात री बगत ई तेज गर्मी रही। प्रदेश मांय घणखर ठोड़ां पारो 40 ऊं 43 डिग्री सेल्सियस बीचे दर्ज कर्यो जा रह्यो है। मौसम केन्द्र जयपुर रा निदेशक राधेश्याम शर्मा बतायो के बीकानेर, भरतपुर, जोधपुर, अजमेर अर जयपुर संभाग मांय 16 जून तांई कठे-कठे बादळां री गाज सागे तेज बारिश रा आसार है।

000

एशियाई खेलां मांय सोना रो तमगो जीतण वाळा दिग्गज निशानेबाज जसपाल राणा देवलोक व्हे गया है। उनपचास साल रा राणा भारत रा निशानेबाजां ने पिस्तौल चलावण री सिखावण देवण मांय लाग्योड़ा हा। राष्ट्रपति द्रौपदी मुर्मू, उपराष्ट्रपति सी.पी. राधाकृष्णन, प्रधानमंत्री नरेन्द्र मोदी अर गृह मंत्री अमित शाह समेत केई नेता निशानेबाज जसपाल राणा रे देवलोक व्हेवण परां गहरो शोक जतायो है। केन्द्रीय खेल मंत्री डॉ. मनसुख मांडविया जसपाल राणा ने चैंपियन एथलीट बताता थकां कहयो के वां रा योगदान ने हमेशा याद राख्यो जावेला।

000